

LA PATRIE DAL FRIUL

SFUEI MENSÎL INDIPENDENT

www.lapatriedalfriul.org

info@lapatriedalfriul.org

Direzion e Aministrazion - Udine - via del Cottonificio 129

Tassa pagata / Taxe perçue Udine Italy - mensile / mensil spedizion in abonament postâl Poste italiane s.p.a.

EDITORIÂL

PLUI FURLAN TES ISTITUZIONI, SÛ MO!

Erika Adami

** La sentade di insediament dal gnûf Consei regionâl dal Friul-Vignesie Julie si è vierte cul zurament dai 49 neu elets conseîrs regionâi. Ducj a àn lete la formule rituâl in lenghe taliane: «Giuro di essere fedele alla Repubblica e di esercitare il mio ufficio al solo scopo del bene inseparabile dello Stato e della Regione». Il regolament al previôt che si puedi pronunziâ ancje tes lenghis minorizadis feveladis in region e ricognossudis par leç, e cussì in disevoit le àn ripetude in lenghe furlane, doi par sloven, un par todesc.

** Un – Piero Camber di Forza Italia, no gnûf a provocazions di cheste fate – al à doprât il latin, aben che nol fos consintût, cu la motivazion che e je «une lenghe che bessole e rapresente lis lidris de nestre bimilenarie civiltât cristiane – al à dit –: lis sôs tradizions, i siei valôrs che al è nestri compit no dome di difindi, ma di valorizâ, in primis esaltant chel che al unis e no chel che al divît».

** Salacor, il conseîr Camber al pense che fevelâ par furlan, sloven o todesc al sedi sinonim di division. Nô o pensin propit il contrari. O vivin intune tiere che di simpri e mastie tantis lenghis. E te lenghe si lei ancje la identitât di un popul. Cui che al nas ta cheste tiere e al pense che la identitât no sedi un repert di museu, ma «un element dinamic, inclusif – ricuardant lis peraulis di Agnul Floramo intun so biel intervent sul teme –, no pues no jessi une persone di (al va indevant a pagj. 2) ►

RIFORME DE GLESIE UDINESE IN PERICUL LA SOREVIVENCE DES PIÇULIS PAROCHIIS

Inchieste a pagj. 4-5



IL COMMENT

Scuele furlane. Jutoris concrets, no cjacaris

Walter Tomada

Un altri an di scuele al è finît: ma cemût stae la tutele de marilenghe tes nestris classis? Miôr o piês dal an passât? La rispueste no je facile, come che no je mai stade facile la vite a scuele par cui che al voleve insegnâ furlan: ma a son simpri stâts une vore i mestris che no si son rindûts a cheste situazion e che a àn lavorât istès. Cumò la suaze istituzionâl par puartâ il furlan te azion didatiche di ogni di e je, ma a restin une vore i berdeis di superâ. A scomençâ dai timps: i dâts des iscrizions (za fatis a Fevrâr) a vegnin comunicâts ae Regjon pai 30 di Setembar. E il trasferiment des risorsis al è lunc: dispès i bêçs a rivin dopo mès e mès, cussì in tancj puecj dulà che nol è automatic cjatâ cui che al insegue furlan, la ore di lezion sielzude dai gjenitôrs pai lôr fis e ven fate dome tai ultins mès dal an, magari di presse e cence dâ continuitât ae esposizion ae lenghe (robe fundamentâl par imparâ ben). I dâts des fameis che a intindin

zovâsi dal insegnament dal furlan a son stâts simpri bogns, par fortune: ma a cheste domande di educazion bisugne rispuindi cun plui decision (e soledut plui risorsis) de bande de formazion. Al covente jemplâ cun int simpri plui preparade e cui titui juscj la liste di chei che a puedin insegnâ il furlan, e par dâ un jutori a ducj chei che a son za in servizi di un pieç, ae fin dal 2016 al è nassût Docuscuele, il Centri di documentazion, ricerche e sperimentazion pal furlan te scuele. La creature di Agjenzie Regionâl pe Lenghe Furlane e Filologjiche e sta viazant ben: intun an e mieç e

à tirât dongje cu lis sôs iniziativis plui di un miâr di insegnants. Fin cumò lis sôs azions a son stadis indreçadis ae formazion metodologjiche e linguistichis, ae catalogazion des buinis praticis (che a vegnin cjamadis online su www.scuelefurlane.it) e ae edizion di materiâi valits di puartâ daurman inte programazion didatiche. La serie si clame “Marilenghe te scuele”: l’an passât a son jessûts i prins cinc volums di unitâts modulârs pe scuele primarie, e in chestis setemanis a stan partint par dutis lis scuclis i gnûfs siet volums di “Marilenghe te scuele

2”. Ma dopo chescj 12 volums a pro de scuele primarie, a son za in cantîr chei pe secondarie di prin grât e pe scuele pe infanzie. Jutoris concrets, no cjacaris. Ma ancje chi al coventarâ tai prossims agns il salt di cualitât: ven a stâi si varâ di decidi se al è chrest il braç operatîf ideâl pe scuele furlane, o se al è stât dome un esperiment biel e partecipât. A sclarilu, a saran i stanziaments che a vignaran fats de Regjon. Di proclamis, no ’nd è plui bisugne: a coventin azion e atenzion. Al è ancjemò un grum di lavôr di fâ, duncje, ma i pas indevant fats inte scuele furlane si puedin viodi e tocjâ cun man. Judâ i mestris dut câs al è compit di ducj, prin di dut des fameis che a àn il dovê di pretendi che ai fis ur vegni insegnât il furlan cu la stesse dignitât e cualitât di cualsisedi altre materie. Se a podessin di la lôr, cuntun scandai di valutazion dal percors previodût par dutis lis scuclis de Regjon, magari la lôr vòs e sarès plui scoltade. ■

❖ a pagjine 2

**PUBLICÂTS
I RECITÂTFS LITURJICS
DI PRE ‘SEF CJARGNEL**
Une antologjie uniche
par rifletî su fede
e identitât culturâl

❖ a pagjine 3

**MINORANCIS LINGUISTICHIS
AL ASSESSÔR ROBERTI.
INTERVISTE ESCLUSIVE**
Sì ae cjarte di identitât bilengâl,
no ae competence linguistichis
pal acês al implei public

❖ a pagjine 6

**VONDE FORMADI
E SALAM. UN ATENTÂT
AE TAULE FURLANE?**
L’agronom Costantini:
«I aliments no àn plui gust
e proprietâts di un timp»

❖ pagjine 7

**LA PROPUESTE
TURISTICHE REGIONÂL?
DUTE DI TORNÂ A PENSÂ**
L’espert Di Suald: «Si vent mâr
e mont, ma nuie che al identifichi
pardabon il teritori»

❖ a pagjine 9

**UNE EUROPE
DI COMUNITÂTS
CHE A RESISTIN**
De Grece ae Catalogne
a rivin “lezions”
bunis par ducj

EDITORIÂL

Plui furlan
tes istituzions, sù mo!!

(di pagj. 1)

mentalità vierde e di grandis
visuâls». Po, vè a cjâr, capi e
valorizâ la diversitàt “interne”
al jude a jessi plui vierts tai
confronts di chê “esterne”.

** Po ben, cence vè la pretese
di fâ cambiâ idee a dinissun,
o vin dal sigûr preseât il
ricognossiment de nature
plurilingâl e multicultural
de regjon rapresentât dal
zurament in plui lenghis di
buine part dai gnûfs conseîrs
regjonâi (sul imprim de
legislature precedente a jerin
stâts tancj di mancul). Un
bon segn pal avignî. No si à
mai di dismenteâ, di fat, che il
ricognossiment dal pluralism
linguistic nol è un aspjet
secondari di une democrazie
vere, reâl e sostanzial. Doprà la
proprie lenghe in ogni ambit e
in ogni forme di comunicazion
– a scuele, tai media, intai
rapuarts cu lis istituzions e
tes istituzions... – al è un dirit
linguistic che al jentre intai
dirits fundamentâi de persone,
e la lôr tutele e je un dai
compits dal stât contemporani
democratic. Tal rispiet
de legislazion in vore
(comunitarie, statâl e
regjonâl).

** Forsit ur mancje un pôc
di braure e di convinzion –
sperin dome chestis... – ai
nestrîs conseîrs regjonâi,
stant che te tierce sentade de
assise (li che a jerin clamâts
a comentâ lis declaracions
programaticis dal president
Massimiliano Fedriga) dome
doi a àn fevelât te lôr lenghe, e
par furlan dome un: Massimo
Moretuzzo, cjâf grup dal Pat
pe Autonomie, gnove jentrade
tal panorame politic regjonâl.
O vin sintût, però – e cui che
al frecuente di plui i palaçs de
Regjon nus al conferme –, che
il furlan si lu fevele simpri, ce
no!, tai coridôrs istituzionâls.
Ma cuant che si met pît
in aule, si cambie registri
linguistic.


** Si permetin alore di
ricuardâ che lis lenghis
furlane, slovene e todesce,
insiemi cul talian lenghe di
Stât, a son un patrimoni che
al è di dute la coletivitàt. La
possibilitàt di podè doprâlis
in duçj i ambits de vite e
rapresente une ricjece par
duçj i citadins dal Friûl-
Vignesie Julie dal pont di viste
de cressite culturâl, sociâl e
ancje economiche, di là di
jessi fatôr di inclusion e di
convivenza pacifiche. Lu àno
capît o no i nestrîs sorestants?!
Al è timp di dânt prove. ■

FEDE E IDENTITÂT CULTURÂL

Glesie Furlane e pubbliche “I Recitatîfs Liturgjics” par cure di pre ‘Sef Cjargnel

Une antologjie uniche di 28 composizions cu la partecipazion dal Coro “Rôsas di Mont” de Plêf di Guart

Alessio Screm



LA CUVIERTINE DE GNOVE RACUELTE E PRE 'SEF CJARGNEL



A son tantis lis iniziatis e
lis ativitâts che a puartin
indenant cun passion e
competence, cul desideri di viodi la
lenghe e la culture furlane nobilitade,
no dome in place (indulâ che in
vèr al è inmò tant di fâ), ma ancje
in glesie. Il grup di Glesie Furlane
al fâs chest, par vocazion, fint dai
agns '70, cuant che al è nassût tal
contest de cussience autonomiste e
daûr dai pas de Teologjie de libera-
zion tacade di pre Checo Placerean.
Une schirie di iniziatis dilunc cuarante
e passe agns, votadis a vierzi
la cause, stimolâ la
cussience, a tignî
cont, doprà e tra-
smeti la lenghe fur-
lance ancje intal cûr
des funzions religio-
sis. Il grup al à bielzà
fat la traduzion in
marilenghe de Bibie
tal '97, dal Lezionari
tal 2001, e prontât il
Messâl Roman, cun
tantis azions pal so
ricognossiment, e

una liste lungje di altris publica-
zions, mostris, concerti, incuintris
di ogni ordin.
Di resint, a àn sburtât fûr, una daspò
chê altre, trê bielîs e impuartantis
ideis, diventadis reatât: il libri “50
Corâi de cristianitàt todesce voltâts
par furlan” (2016), il film documen-
tari “Missus” (2017), produsût de
Raja Film, curât e diret dal regist
udinês Massimo Garlatti-Costa,
e di pôc il dopli cd “I Recitatîfs
Liturgjics”, une antologjie uniche,
che e viôt la partecipazion dal Coro
“Rôsas di Mont” de Plêf di Guart.
Daûr e dentri di duçj chescj lavôrs,

e je la figure e la anime di pre ‘Sef
Cjargnel, il predi musicolic disparût
in maniere improvise tal Dicembar
dal 2017. Un om che al à dedicât la
vite interie, cun semplicitât e no
cence profunditât, ae cause furlane
in dut il so insieme.

Cheste ultimeraçuelte in particolâr,
si propon di jessi – come che al scrîf
pre ‘Sef, che purtrop nol à podût viodi
la publicazion – “un jutori che al
cîr di procurâ chei furniments poe-
tics e simbolicis che la estetiche e la
art a puedin burî fûr, par voluçâ il
popul che al celebre, tune atmosfe-

re di contemplazion
dal misteri, vier-
zintlu ai segnâi de
Gracie e de udience
dal Spirt”. A son pro-
tagoniscj i cjants pa-
triarçjins che pre ‘Sef
al à cjapât sù tai agns
de vive vòs dal po-
pul furlan, studiâts
fasint paragon cun
altris testimonean-
cis, altris lezions, fin
a rivâ a meti dongje,

a meti in notazion, a fâ esegui e a
regjistrâ un bon grup di Salms e
Lezions, par un total di 28 compo-
sizions.

O vin domandât al segretari di Glesie
Furlane Christian Romanini cual-
chi impression sul stât de art des
lôr iniziatis. «Se di passe cuarante
agns o sin inmò che o scombatìn
pe cause e o vin ancjemò di puartâ
a cjase la aprovazion dal Messâl
Roman voltât par furlan – al dîs –,
dal sigûr al è ancjemò tant ce fâ.
Ma o scugnìn constata che, se a
nivel populâr e ancje fûr o ricevin
atestâts di stime e afiet, la jerarchie

eclesiastiche locâl e une cierte *inte-
ligentia*, plui che supuartânus, nus
sopuartin».

Cuale ise la formule juste di doprà
par tornâ a meti il furlan e la só
int al centri de vite in Friûl? «Al è
dibant platâsi daûr di un dêt, ma
int tant che pre Renzo Dentesan,
pre ‘Sef Cjargnel, ma o zonti ancje
pre Antoni Beline e altris nons tant
che pre Checo Placerean, pre Pauli
Varut, a jerin fis di une stagion che
e à parturîts “grancj cjâfs”: la vere e
genuine classe inteletuâl furlane.
Vuè come vuè, se o vin di fevelâ di
predis, o vin ancje il probleme che
a 'nd è simpri di mancul, la età me-
die dai predis che a son ancjemò in
Glesie Furlane e cres simpri di plui.
Duncje al è evident che al è une
vore plui dificil che a nassin gnûfs
pastôrs che a podedin vè ancje
chê funzion di inteletuâi organics
dentri de societât furlane. Come
associazion, o vin il contribût dai
laics che a cirin di dâ une man. Al
è di sperâ che l'esempli dai “predis
iluminâts” al podedi ispirâ i laics e
che e sfloriss finalmentri una classe
inteletuâl laiche che e vedi a cûr il
Friûl, e che e fasedi di “pastôr”». ■

Avôt dal Friûl, Messe a Aquilee

Domenie ai 15 di Lui, aes 6 sore
sere, a Aquilee inte Basiliche Mari
si tignarâ il tradizional Avôt dal
Friûl ai Sants Macôr e Fortunât,
prin vescul di Aquilee e il so
diacun, nestrîs patrons. La Messe
par furlan e sarâ celebrade dai
predis di Glesie Furlane. ■



LINT FURLANE

Il Friûl al cjale bande une gnove Europe

Dree Valcic

** Il quadri statâl si è di gnûf di-
scomponût e al è dificil interpretâ ce
che al podarâ sucedi in Italie e cualis
che a podarâ jessi lis consecuen-
cis pussibilis pal Friûl e pe Regjon.

** Si palese simpri plui a clâr –
cemût che al previodeve, anzit a
chest pont “al profetizave” Sergio
Cecotti in tims no suspies – che lis
dôs visions vuè in cjamp in merit ae
Europe (chê “junckeriste” de Merkel
e dai banchîrs, cussî cjare ancje al
renzisim, e chê “lepeniste” dai so-
vranscî di cjase nestre, Salvini e Di
Maio) a rapresentin lis musis di une
stesse medaie.

** Une monede false tant che chê
di Buie, dôs posizions, doi progjets
che a provin a meti tal cjanton, a fâ
fûr, la uniche prospettive di futûr: la
autodeterminazion dai popui intu-
ne Europe che e passi il concet di
stât nazion, intal rispiet di une de-
mocrazie di base, cussiente di dirits
e di dovês.

** Dificil, o disevin, previodi cemût
che in concret chest scuintri si inter-
secarâ cui destins locâi, se no pro-
ponintnus una campagne elettorâl
continue, dulâ che i problemis reâi a
saran metûts in bande, par altri cun
grant suspîr di liberazion de bande
dai gnûfs governants.

** A paiâ o sarin in dut cês simpri
nò, il Friûl, che no viodarîn nissun
plan strategic, nissun resonament
di disvilup, e tant mancul nancje di
rimiedi al stât di depression sociâl,
economiche e istituzionâl là che si
cjate.

** No stin fâsi freolâ duncje di un
scuintri aparent là che i interès ra-
presentâts a son di une classe poli-
tiche e di un stât che nol è bon di dâ
rispuetis, un stât simpri plui fat sù
intor di se, intun declin che nô no
volin jessi partecipis. Se il Friûl al è
altri a pet di chest quadri dramatic, e
je rivade la ore di dimostrâlu. ■

DANUS UNE MAN 5 PAR MIL

Ancje chest an, cu la declarazion
dai redits tu puedis dâi une man a
La Patrie dal Friûl, il mensîl
dut in lenghe furlane dal 1946.
Nol coste nuie, baste meti il numar
01299830305
te casele juste:

Firme achi
01299830305

SOSTEGNO DEL VOLONTARIATO E DELLE ALTRE
ORGANIZZAZIONI NON LUCRATIVE
DI UTILITÀ SOCIALE, DELLE ASSOCIAZIONI
DI PROMOZIONE SOCIALE E DELLE ASSOCIAZIONI
E FONDAZIONI RICONOSCIUTE CHE OPERANO
NEI SETTORI DI CUI ALL'ART. 10, C. 1, LETT. A9,
DEL D.LGS. N. 460 DEL 1997
e firmâ la destinazion dal 5 par mil

INTERVISTE

«O sarai il triestin plui furlan che o vedis mai cognossût»

Sì ae cjarte bilengâl, no ae competence linguistiche pal acès al implei public. I intindiments dal assessôr regjonâl cu la deleghe aes minorancis linguistiche Pierpaolo Roberti

Dree Venier



PIERPAOLO ROBERTI

Pierpaolo Roberti, un dai "fedèi" di Massimo Fedriga, al è il gnûf assessôr aes Autonomiis locâls, sigurece e politicis comunitariis. Al à ancje la deleghe aes minorancis linguistiche, che Fedriga al veve ipotizât che e podès restâ in cjapitul ae Presidence, ma che duncje e je lade al assessôr aes Autonomiis locâls. 38 agns, nassût a Triest, impleât contabil, di agns al è impegnât cu la Lega Nord, che al è ancje segretari provinciâl. A Triest, par mès al è stât il candidat sindic oficiâl pal Carroccio e, dopo l'acuardi cun Dipiazza, al è diventât vicesindic une volte vinçudis lis elezions. Dopo, la candidature aes Regionâls. Tant sensibil sul teme sigurece, di vicesindic doi agns indaûr al à butât l'ingai dai «Volontaris pe sigurece di Triest».

Dentri de Lega nol à ciert il rûl dal moderât: al è autôr di ordenancis e declarazions che a fevelin a ché che si dîs "la panze" dai eletôrs. O vin decidût di sintîlu par savê la sô vision su lis minorancis in regjon e in cont di politiche linguistiche, cun tante curiositât pes sôs rispuestis. Il President Fedriga, di fat, al jere stât l'unic dai candidâts ae Presidence

de regjon a no vè rispuindût a une serie di domandis fatis dal Comitât 482 su temis specifics in cont dal furlan. Il gnûf assessôr nol contradis la innomine di om cence pêi su la lenghe, e nus da rispuestis diretis e secjis. Cundut che al vedi assumût di pôc la incarghe, e duncje par cumò si fevele di intindiments di verificâ cui fats, l'orientament al pâr volê promovî ancje l'ûs concret des lenghis minorizadis de regjon, ma cualchi «no» iniment lu à za, in plui di une opinion avonde sbaliade sui cartei bilengâi.

Roberti, sul sît de Regjon la definizion dal sô rûl, "assessôr aes Autonomiis locâls, sigurece e politicis comunitariis", no cjape dentri ancje la definizion "minorancis linguistiche". Ise la definizion corete e

definitive?

«La definizion ripuartade sul sît e intal at formâl di assegnazion des deleghis no jentre intal specific, ma e agreghe variis funzions lant daûr dal organigram de strutture regjonâl. Tant par citâi cualchi esempi, mi ocupi ancje di imigrazion e di volontariât, in plui che di lenghis minoritariis».

Ce cjaparaie dentri intal specific la deleghe aes minorancis linguistiche? Ce azions intindial davuelzi?

«A esistin leçs nazionâls e regjonâls a tutele des lenghis minoritariis che a van fatis rispjetâ, ma il gno mandât nol podarà ciert limitâsi ae lôr aplicazion frede. O calcoli di fat che lis lenghis feveladis sul nestri teritori a cjapin dentri in se la biecede di une tiere là che int e culturis diferentis no dome a convivin in pâs, ma si nudrissin in maniere mutuâl, adusint un contribût impuartant ae ricjece dal Friûl-Vignesie Julie. Il gno impegn, duncje, al sarà indreçât no dome al miôr ûs dai fonts statâi e regjonâi, ma ancje a intiessi un rapuart plui strent cu lis associazions, cu la Agjenzie Regjonâl pe Lenghe Furlane, cul teritori, cul ufici scolastic regjonâl e cu lis emittentis televisivis locâls».

Ce pensial dal "bum" di zurements ancje intes lenghis minorizadis che al è stât al insediament dal Consei regjonâl? Ce segnâl isal?

«O pues dome che ricjapâ la rispueste dade prime: lis diviersis culturis inlidrisadis in sens storic in Friûl-Vignesie Julie a son un valôr zontât pe nestre tiere, e il fat che chestis specificitâts a cjatin grande rapresentance in Consei, in maniere simboliche ancje cui tancj zurements par sloven, furlan e todesc, mi à fat plasê».

Intal curriculum che al à presentât pe Zonte dal Comun di Triest, al è scrit che la sô capacitât linguistiche e je "inglês sufficient". Leint cheste curiositât, mi è vignût daurman iniment di fâi la domande se par lui si à di studiâ prime l'inglês dal furlan, come che si sint a di cualchi volte...

«La lenghe inglese e covente par comunicâ cul mont; il sloven, il furlan, il todesc – intes lôr areis rispjetivis di influence – a son lidris di sborfâ par mantignîlis ben saldîs aes nestrîs origjins».

Secont cualchidun la specialitât si base prin di dut su lis particolaritâts che nus son ricognossudis a nivel costituzionâl in relazion ae presince di ben trê lenghis minoritariis. La Regjon no à mai pontât a fuart su chest aspjet cuntune politiche decise bande l'ûs dal furlan. Contribûts sì, ma nuie che al puedi puartâ a une inversion di tindince a pet dal câl dai locutôrs, cuasi a volê acompagnâ la lenghe bande une "muart cuiete". Podaraie jessi une svolte e, intal câs, puedial fâ cualchi esempi?

«O soi triestin, innamorât dal gno dialet; un dialet che, dal sigûr, ancjemò di plui des lenghis tuteladis de leç, al sta a planc sparint. O capîs duncje dal dut il probleme. Agjî par invertî cheste tindince al è sigûr e al va fat propit sui canâi che ché "muart cuiete" a son daûr a procurâl – televisions, gjornâi e ducj i mieçs di comunicazion – e che, vint caratar nazionâl, a standardizin par fuarce di robis la comunicazion».

Dât l'asset de Zonte, la azion su lis politicis pes lenghis minoritariis e podarès jessi dividude in trê, cun interessadis ancje la assessore ae Culture Tiziana Gibelli e ché ae Istruzion Alessia Rosolen. Cemût agjirêso? Podarèssino jessi metûts in vore imprese di coordinament?

«Ceste e je une scudare che e à dimostrât, fin dai prins pas, di savê lavorâ insiem instreçant, cence problemis di sorte, lis deleghis par fâ buinis lis smiris di guvier che o vin».

Dai trê assessôrs parsore, une e je di origjin furlane, ma e je nassude e e à davuelte dute la sô ativitât politiche in Lombardie e doi – che mi passi la definizion – a son "triestins fûr par fûr". Al è un pôc di pinsîr intai ambients furlanisej par chest: nus puedial confuartâ?

«O soi triestin, cemût che o disevi; in maniere braurose triestin. No fâs nissune future, duncje, a capî lis

domandis di tutele de bande des specificis identitâts. E su chest front o sarai il triestin plui furlan che o vedis mai cognossût».

Di une investigazion fate intal ambit de resinte conference regjonâl sul stât dal furlan promovude de ARLeF, sui sîts publics regjonâls lis lenghis minoritariis in pratiche no son. Si puedial pensâ a une azion su chestis vetrinis impuartantis bande l'esterni?

«In chescj prins dîs di mandât o ai scugnût dedicâmi dal dut a urgjencis improrogabilis che a rivuardin lis autonomiis locâls e a cognossi i uficis, ma in curt o cjatarai i rapresentants de ARLeF e cun lôr o discutarai ancje di cheste tematiche».

Ce pensial de propueste di vè la competence linguistiche par furlan, sloven e todesc almancul tant che carateristiche acessorie pal acès al implei public?

«O soi contrari. Ceste e je je une misure che e podarès jessi calcolade discriminatorie viers di cui che nol fevele il furlan. L'obietf nol pues jessi chel di creâ riservis, ma di fâ in mût che ché lenghe e sedi fevelade di une maiorance».

Une riforme a "cost zero" e podarès disponi de cjarte di identitât bilengâl talian/furlan...

«Al sucêt za pal sloven. Si pues fâ».

Si fevele di agns de dibisugne di une strutture di programazion Rai autonome pal furlan. Saraie pussibile?

«Cumò che biadlore o vin un Guvier, ancje se di pôc timp, si partirà cuntun confront su chest teme, come su tancj altris».

I cartei stradâi bilengâi a son previodûts de leç 482, ma intai ultins tîmps si son regjistradis tantis violazions su la cuistion. E je stade une polemiche cualchi mès indaûr parcè che inte convenzion cun Friuli Venezia Giulia Strade nol è stât metût dentri a clâr chest oblic. Cemût pensial di vuardiâ la atuazion?

«La leç e à di jessi rispjetade, simpri. Se no plâs, o si stime che la misure e sedi masse dispendiose in rapuart al risultât rivât, si cambie».

O vin fevelât soledut di furlan. Puedial di la sô vision a pet di chês altris lenghis de regjon, lant dal sloven plui tutelât al todesc, che su chel fin cumò no si à lavorât tant?

«Dal sloven o ai fevelât za. Par ce che al toçje il todesc, o soi convinçût che cul passaç di Sapade dal Venit al Friûl-Vignesie Julie ancje la "fuarce" dal todesc cence fal e cressarà».

Par sierâ... Cuale ise la competence in "marilenghe" dal assessôr cu la deleghe aes lenghis minoritariis? Nus saludial par furlan?

«Mandi!». ■

**Par viodi chei altris contignûts
de “La Patrie dal Friûl”,
abonaitsi. Dutis lis informazions si cjatin sul sît
www.lapatriedalfriul.org**

**Per vedere gli altri contenuti
de “La Patrie dal Friûl”,
abbonatevi. Tutte le informazioni si trovano sul sito
www.lapatriedalfriul.org**

Che tu sedis za abonât o che tu le vedis lete dome cualchi volte,
aboniti o rinove l'abonament a un mensîl unic:
almancul une volte al mês, lei par furlan!

